



Tir Yimym

www.tirymym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tirymym@gmail.com

TAPAK 7

Yangia anidakangma :



Tir Yimym



tir_yimym



tir yimym

TAPAK 8

BLA-i train hijack asüba sülen
Pakistan PM-i Quetta semdang

Mahmudullah international
cricket asaya nungi anener



VOL. XXII ISSUE NO. 149 (ADOK 149)

DIMAPUR

ROGONÜ (FRIDAY)

METSÜREMI (MARCH) 14, 2025

₹ 5.00

MP S Supongmeren Jamir-i Parliament nung VG tebilemtsü lemsatep



S. Supongmeren Jamir, INC, Nagaland (Nagaland)

पीठासीन : माननीय अध्यक्ष

Dimapur, Metsüremi/March 13 (TYO): Tang temendak Parliament Budget Session 2025 nung Bodhbarnü MP Lok Sabha, S Supongmeren Jamir-i Nagaland Village Guards tim atemba indang lemsatep aser Union Home Minister dang temulung agütsütsü ajungshia liasü. 1957 küm tentetba sülen village guards temi Mon, Tuensang, Kiphire, Meluri, Noklak aser Longleng district tem awajema Indo-Myanmar arütsü nung yimtsüng 120 nüka

arur, saka state sorkar aser Ministry of Home Affairs ajanga mashishi yuja arur, ta pai ashi. Tang village guards nem itasen 3,000 den küm nung clothing allowances sen 100 aser ita shia chiyonga ajemtsü (ration allowance) sen 60 agütsüba ya senzüka yutsüba temaitsü lir, ta MP S Supongmeren Jamir-i ashi. Pai ministry dang village guards asendenshia tashi itshtisü aser arütsü atsüdanga 'free movement' sentong melen arütsüleni yoktsü ajungshia liasü.

ADC Tuli ajanga sangdonger

Dimapur, Metsüremi/March 13 (TYO): Tuli Sub-Division kübok Asangma yimtsüng nung African Swine Fever (AF) putetba mechi Asangma yimtsüng aser temeket kilometre ka telungzük ya "Infected Zone" ta sangdongser aser Asangma yimtsüng nungi temeket telungzük kilometre toku ya

"Surveillance Zone" ta sangdonger, ta Additional Deputy Commissioner, Tuli, Relise Sangtam, NCS ajanga sangdong ka nung ashi. Iba zone ana nungya ak alepba, ak aser ak chanu bener aruba aser danga leni bener aoba, ak aser ak shi belenba nokdager, ta sangdong ajangasa metetdaksü.

Manipur: Naga nunger MLA trok-i Governor ajuru

Imphal, Metsüremi/March 13 (Agencies): Taoba Manipur Water Resources Minister Awangbow Newmai-i Naga nunger MLA trok-i Brehostibarnü Manipur Angh Ajay Kumar Bhalla den Raj Bhavan, Imphal nung ajurutepa tang Kuki-Zo telok temi mokdangba ajanga timtem ajuruba indang jembia liasü. MLAs Awangbow Newmai, Khashim Vashum, Losii Dikho, Leishiyo Keishing, J. Kumo Sha, aser Janghemlung Panmei nunger temi Manipur Angh den ajurutepdang March 8 nungi Manipur indang national highways tem mapang telatet makai mokdangba ajanga nüburtem timtemba indang khuret lemsatepa liasü. State nung yimjung tanaben

bener arutsü asoshi parnoki Angh dang amalitep akatsü aser yariteptsü mulunga aliba lemsatep. Naga People's Organisation (NPO) ajanga iba mokdang aija mepetmesü tali makumtsü mechi ghonda 24 tsüngta agientsü sorkar dang ajungshiba sülen iba senden ya amen. Nüburtem aser talisa state nung Naga nunger tem timtem ajuruba indang NPO ajanga lemsatepa liasü. NPO-i mapang züngzüksüba den külemi iba mokdang mapa inyaker nem tapet temerenshi agütsütsü ayongzüka liasü. Manipur nung züngsem 60 aliba Legislative Assembly nung menden ter Naga nunger asoshi wazüka yuja lir.

State budget nung Stalin sorkari Rupee maitsü melen

Chennai, Metsüremi/March 13 (Agencies): National Education Policy (NEP) anema sashi-sashia nokdaka, M K Stalin-i aniba Tamil Nadu sorkari Brehostibarnü state indang 2025-26 Budget nung official rupee symbol (₹) melen Tamil ojang 'Ru' amshi, koba 'rubai' (Tamil nung rupees dang ajar) nungi agizükba lir, aser iba budget ya Hokulbarnep benoktsü.

State kati linük indang sen maitsü magizükba ibai mezüngbuba alitsü, aser NEP anema nokdakba jenjang tasen ka lir.

Social media sapang X nung state budget indang 'teaser' ka lemsatepba nung, "Nübur ajunga ajangzüksü atema Tamil Nadu tesem ajaklen terenlok asoshi..." ta Chief Minister Stalin-i zülü.

Sen maitsü melenba indang jembidang, "Onoki Rupees melen Tamil oshi inok. Ibai toktepba masü, yangji ozüng raksaba kecha mali. Onoki Tamil oshi nung temulung agütsütsü, aser iba yongji sorkari iba mera ya agi," ta DMK lenir Saravanan Annadurai-i ashi.

"Ni parnok dang Tamil oshi tim yimya nung ajungkettsü ashi. Shisaluyim tsütsü Tamil Nadu maneni junga inyaker. Nüburtem yangnungi North India leni maor,



parnok US aser UK-i aor. BJP-i aji magizükteter," ta paisa ashi.

Iba maitsü yanglusang indang jembidang, "Tamil Nadu nungi nisung kari iba maitsü yangluba atema linük tejak tentettsüla. Ibai shiba ajanga yanglu mesüra meyangu ta asüba indang masü. Ibai Tamil oshi ajungketba indang lir, aser asenoki ya amshiba kecha ozüngia menokdangtsü," ta Annadurai-i ashi.

Iba maitsü ya Tamil nunger kati yanglu, kechiaser Tamil nungeri ajanga asenoki takok tulu angur, ta pai ashi.

Sorkar ketdangsiuri ashiba agi iba logo melenshiba ya sen nung masü state budget paper nung dang lir.

Ajisüaka BJP lenir Tamilisai Soundararajan-ibo, "Parnoki iba ya par politics atema amshir dang. Tamil oshi amshiba ni

manemer. Ibai political drama dang lir. Parnoki kechiba pei chir government schools nung mezüngdaksür? Tamil atema BJP-a tejak tenteter, saka Tamil oshi nung DMK kibur mekumtet," ta ashi.

Tamil Nadu BJP tir Annamalai-i iba ya Stalin indang tamachi map aka lir ta ashi.

Iba maitsü ya Thiru Udhay Kumar-i yanglu aser pa ya DMK MLA ka jabaso lir, ta pai ashi.

Stalin-i aniba Tamil Nadu sorkar aser Centre tsüngta oshi-oben tsütsü rara tesashi tenzüka aliba mapang Tamil Nadu indang state budget nung sen maitsü ya melen.

NEP tasenba nung 'three-language formula' ajanga state nung Hindi oshi benoktsü meranger, ta DMK-i Centre aitsür.

BJP Nagaland dang osang tiazü meporoktsü ayongzüker: NPCC

Dimapur, Metsüremi/March 13 (TYO): Tawa BJP Nagaland tiri 58 Shamator Assembly Constituency nungi Congress workers aser ketdangsiur meyrirjang aika BJP dangi meyipogo ta jembiba ya khenyongi tai lir, ta Nagaland Pradesh Congress Committee (NPCC) sangdong ka ajanga ashi.

BJP Nagaland lenir kati iba ama bangsobangji o tiazü jembiba ya magizükteter, ta ashi. District Congress Committee (DCC) Tuensang indang report nung BJP nung adentsü mulunga meyongnem agütsür nisung 13 dang lir, ta NPCC sangdong

ajanga ashi.

Aser item rongnung nisung 11 dang Congress züngsem ama tenüng zülüoka liasü aser tanüngba nisung ana ya kodanga Congress züngsem meliasü.

Congress nungi BJP nung adener ya Richard Yimkhuing, Retired IGP (IPS) aser pa kinungsü Shojila Yimkhuing den Yakor yimtsüng nungi S. Lakhang; Huker yimtsüng nung Khiungreto aser Yakso, Mahila aser Riola; Huker Village B nungi Thrimhokiu, Wongji aser Chelu; Rürü yimtsüng nungi Richard Yimto; Sangpur yimtsüng nungi Shojila aser Shamator Village A

nungi Yanshu alitsü. Tanüngba nisung ana ya kodanga Congress nung tenüng mezülüok aser tena ya Chessor yimtsüng nungi Royim aser S. Kioshu alitsü, ta NPCC sangdong ajanga ashi.

BJP Nagaland ajanga Congress worker meyrirjang aika party melen ta jembiba ya khenyongi tai. Nüburtem mangmangdaksütsü aser ajaki yarir ta bilemdaksütsü mechi bangsobangjia jembia ta kuli ajanga sayur. Anungji INC Nagaland ajanga BJP Nagaland dang ochi nung nokdaka tiazü osang meporoktsü ajungshir, ta NPCC sangdong ajangasa ashi.

Holi benjong mechi Class 12 Hindi paper tatidang balaka agitsü

Guwahati, Metsüremi/March 13 (Agencies): Holi benjong mechi March 15, 2025 nü Class 12 Hindi exam magütsüteter nem khen lir agütsütsü maongka agütsütsü, ta Central Board of Secondary Education (CBSE) sangdong ka ajanga ashi.

Holi ya shidakbo March 14 nü lir, saka region kar nung benjongmung ya March 15 tashi aotsü akok, anungji kaketshir temi tatidang agütsütsü tasak akumer. Iba yongji CBSE-i iba timtem agi kongshia aliba kaketshirtem tatidang ya khen lir

agütsüdaksütsü telemtetba agi.

"Hindi tatidang ya renema aliba ama March 15 nü agitsü, saka timtem ajuruba kaketshir temi iba anogo magütsütsü akok. CBSE indang special examination policy atema temsüa aliba kaketshir den külemi parnok tatidang zülutsü atema maongka agütsüts," ta board ajanga sangdong ka nung ashi.

National aser international saisapong sentong nung shilem agiba kaketshir atema CBSE-i special exams ya agir.

Class 12 atema Hindi Core

(302) aser Hindi Elective (002) exams ya March 15 nü agitsü. Class 12 board exams ya April 2 tashi agitsü aser Class 10 exams ya March 18 nung tembangtsü.

Ano sangdong ka nung CBSE ajanga 2026 nungi tenzüka Class 10 azünger atema küm nung board exams anaben agitsü benoka lir ta ashi.

Iba yagi kaketshirtem pei shimba subject tem nung tanaben tatidang agüja marks tajungba akumtsü maongka tanaben angutsü.

NIT kübok kaketshirtemi Nagaland Angh semdang



NIT kübok kaketshirtemi Nagaland Angh semdangba mapang tangokba noksa nung angur.

Dimapur, Metsüremi/March 13 (TYO): Operation Sadbhavana kübok Assam Rifles (South)-i anir National Integration Tour (NIT) nung shilem ka ama Manipur kübok Tengenoupal District nung school balala nungi kaketshirtemi March 13 nü Raj Bhavan, Kohima semdanga Nagaland Angh La Ganesan den sensaksema liasü.

Sensaksem mapang Angh-i, India kübok tesem balala nung aliba nüburtem chioyngtsü, sobaliba sobosolemtsü amala balala lir

saka asenok ajak telongjem ka lemsateper aser iba ajanga asenok India nunger kümdaktsür, ta ashi.

Paisa, lokti balala nungi shisatsü angazüksüba dang masü saka parnok sobaliba aser libaro agizükteta tenüngsang agütsütsü nüngdakba lemsatep. Paisa, linük kübok tesem balala nung oshi balala jembiba indanga lemsatepa liasü.

Angh-i, aner kanga junga agizükba ya India sobaliba nung tongtubang shilem ka lir ta shia pai kaketshirtem dang parnok Manipur kübok kin

balala nungi asütsü akok, saka parnok ajak ya India nunger ta mamatoktsüla aser asenok ajak ya Mother India jala aser jabsotem lir, ta ashi.

Tour mapang linük kübok tesem balala sema aodang tangazükba balala anguba indang kaketshirtemi lemsatepa liasü.

Kasa mapang nung National Integration Tour Officer-in-Charge Major Jagmininder Singh Khalsa-i, lokti pela agizükba o jemi aser iba sentong indang metetdakja liasü.

Nagaland Angh-i Holi benjung salem lemsatep

Dimapur, Metsüremi/ March 13 (TYO): Nagaland Iba benjung ajanga telongjem, temeim aser tenzükshiba sayur. Iba ajanga yimjung aser tesunep bener arujang. Asenok ajaki Holi benjung ya jangrabangra tepela, takok aser mungdi aser iba ajanga tali yimjiyimjung agi süngla telongjem adokdaktsüti, ta lidakja, ta Angh-i imlaja ataba Angh-isa shisem.

Mokokchung nung Holi-Anti-adulteration Drive 2025 agiogo



Dimapur, Metsüremi/March 13 (Agencies): Food Safety & Standards Authority of India (FSSAI)-i linük ajunga nung taruba Holi benjung mapang chiyongtsü tajung agütsütsü aser chiyongsü temenen agütsüba nungi kümzüka toktsütsü ayongzüker aliba kübok Food Safety Officer Sukumlo Yanthan-i anir Mokokchung Zone, Food Safety Team (Enforcement &

Food Safety on Wheels)-i March 13 nü MMC marketing complex nung "Holi- Anti-adulteration Drive 2025" ayongzüka agiogo. Parnoki, mamatzü, ghee, edible oil, butter, rasgulla, gulabjamun amala chiyongtsütem menena mesüra meyoktepa ali mali aji tendanga liasü, kechiyong benjung mapang iba amala chiyongtsütem kanga ayoker.

Kohima nung Art for Educator program agiogo



'Art for educator' programme nung shilem agirtem tangokba noksa nung angur.

Kohima, Metsüremi/March 13 (TYO): National Education Policy (NEP) 2020 benoka aotsü aliba dak sendakba nung Directorate of School Education Nagaland aser NGO Saturday Art Class na longjemer Kohima district kübok tesayurtem atema 'Art for Educator' program ka takok ngua agiogo.

Anogo ana training nung grade 5 tashi sayuba tesayurtem

school 60 nungi parnok 120-i shilem agia liasü, aser iba ajanga NEP nung keta aliba ama kaketshirtem lenla ajak nung renlokdaaktsütsü atema state bendanga agütsür aliba tali jangjashitsür.

Kaketshirtem creativity, rasa bilemba amala ajungkettsü atema NEP 2020 ya arts-integrated tangazükba dak rangloker lir. Iba inyakyim ya

policy indang nukla koba memorization nungi pilar classroom tem ya exploration aser pei bilemba lemsatepa tesem ka kümdaktsütsü asoshi lir, iba den putepa lir.

Tesayurtem nem parnok tesayuba nung visual arts inoktsü atema tasa agüja Nagaland-i quality, inclusive, aser student-centered education agütsütsü atema jenjang tapet agidar.

Dimapur nung HSS Awareness sentong ka agiogo

Dimapur, Metsüremi/March 12 (TYO): Small Cluster Development Programme (SCDP) kübok looms, accessories, aser lighting units densema Handloom Sector Support (HSS) oset lemtsüba aser awareness sentong ka Brehostibarnü ICM Hall, Toluvi, Dimapur nung agiogo.

Iba sentong ya Nungsanginla Longkumer, Assistant Director (I&C) lenisüba nung agi aser Darogajan Sumi Baptist Church Pastor Rev. Jehoto Yeptho-i sarasadema liasü.

Sentong nung Executive Engineer (I&C) Er. Asenla Walling-i sentepa aliba lokti dang iba scheme nükjidong aser koda benoka inyaker iba indang metetdaktsü, aser NHDP kübok Development Commissioner (Handlooms)-i senotsü teyari agütsüba Special Cluster Development Programme (SCDP) indang metetdaktsü, koba Dimapur nung sütakertem lenla ajak nung terenlok asoshi benokba lir. Iba inyakyim yagi Baman Pukhri A, Baman Pukhri B, Darogajan, aser Kushiabill ta yimtsüng pezü ayimjemer aser iba ajanga sütaker 200 dak tema ajangzükdar.

Iba sentong kübok sütakertemi looms (frame looms and loin looms), solar lighting units, warping drums, aser tanga tenüngdakba osettem agizüksü. Tongtubang sentongtem rongnung skill

upgradation, product development, exposure visits, aser work-sheds o lighting unit atema senotsü teyari agütsüba densema lir.


Scheme kübok beneficiaries tem züngoksema mapang Aadhaar nüngdaker. Laisa, Mongolbarnü nungi tenzüka oset balala lemtsütsü, koba local sütakertem ajungkettsü aser Dimapur nung sustainable handloom development ajungkettsü atema lir ta ashi. Dimapur nung NHDP kübok Special Cluster Development Programme (SCDP) amenokba sentong nung o jembiba mapang MLA & Advisor, Industries & Commerce, Hekani Jakhalu-i, Nagaland nung sütakertem ajungkettsü atema iba ya tetenzüker lir ta ashi. Laisa, sorkar mapaji nüburtem tenzüksüba lir aser iba training aser oset balala lemtsüba ajanga sütakertem taküm liyonga aotsü asoshi tenüngdakba tasa agütsütsü, ta ashi.

MLA-isa, sütakertem dang product design, quality, aser marketing strategies dak rangloker inyaktsü ajungshia liasü.

Sentong nung frame looms aser loin looms, solar lighting units, warping drums, aser tanga tenüngdakba osettem aser kuli kaket certificate tem HSS oset lemtsütsü aliba nung züngoksema liasü.

NAGALAND POLLUTION CONTROL BOARD						
Signal Point, Dimapur – 797112, Nagaland Tel.: 03862-245727, TeleFax: 03862-245726 Website: www.npcb.nagaland.gov.in e-mail: npceb2@yahoo.com						
AMBIENT AIR QUALITY FOR KOHIMA AND DIMAPUR CITY KOHIMA ASER DIMAPUR NUNG MOPUNG MERÜK-MEMERÜKBA JENJANG						
Sl. no	City	Location of air station	Type of area	Monitoring dates		Permissible limit As per the National Ambient Air Quality Standards "Iba tasazük alemabo metudaktsütsüla"
				04.03.2025	06.03.2025	
1	Dimapur	Bank Colony	Residential	144	142	100 µg/m ³
2		Dhobinala	Commercial	238	221	
3		NPCB Office, Signal Colony	Residential	158	143	
4		Tenyiphe, Chumoukedima	Commercial	94	110	
5		Nagarjan	Residential	148	146	
6		Viola colony	Residential	96	94	
7		Burma camp	Commercial	142	145	
8	Kohima	Opposite NST Office	Residential	53	71	
9		PWD Junction	Commercial	165	103	
10		High School Junction	Commercial	154	129	
11		Midland (Upper)	Residential	96	100	

Iba osang ya nübortem ajangzüksü atema Nagaland Pollution Control Board-i agütsür.



March 13, 2025 nü New Delhi nung Defence Minister Rajnath Singh aser Delhi Assembly Speaker, Vijender Gupta na senden amentsü lia tangokba noksa nung angur.

Rajya Sabha nung opposition-i EPIC atema jembitsü akhanger

New Delhi, Metsüremi/ March 13 (Agencies): Bodhbarnü Rajya Sabha senden nung opposition pary temi Election Commission-i agütsüba duplicate Electoral Photo Identity Card (EPIC) numbers atema o lemteptsü takhangba agütsü.

Trinamool Congress lenir, Derek O'Brien-i Deputy Chairman Harivansh dang, Rule 176 kübok EPIC atema mapang tatsüka o lemteptsü mepishi.

Rule 267 kübok opposition züngsem troki EPIC atema o lemteptsü atema notice agütsü, ajisüaka Deputy Chairman-i magizükba sülen Trinamool Congress leniri Rule 176 kübok mapang tatsüka iba onük nung o lemteptsü mepishi.

Harivansh-i, züngsemtemi tanga Rules nung ajemdaker notices agütsü, ta ashi.

Hombar aser Mongolbarnü naprong opposition party temi iba onük nung o lemteptsü atema notice agüja liasü saka magizük.

O'Brien-i, "Onoki na aser sorkar na dang taruba hopta duplicate voters duplicate list atema o lemteptsü mepishir," ta metetdaksü.

Congress lenir, Pramod Tiwari-i, duplicate IDs ajanga state kar nungbo taila voters lakh 48 bendenlokogo, ta metetdaksü.

RJD nungi MP, Manoj Jha-i, EPIC ken o ajanga voters aser yimtenren party aika jashidaksüogo, ta metetdaksü.

Jha-isa, linük temzüng

kübok Arrla 324 ajanga election timi ochishia agitsü atema shia lir, ta metetdaksü.

Jha-i, "Assembly constituencies ka nungi voter ana indang EPICs nung mezüngbuba ojang asemji kasa masütsüla. Ajisüaka state ka kübok assembly menden aika nung voters indang EPIC nung kasa ojang lir," ta metetdaksü.

"Duplicate cards agütsüba ya tebilemtsü onük ka lir. Election ochishia agitsüji tongtibang. Election Commission-i duplicate cards kwi aliar jangjatsüla, iba ya bushisüngdangtsüla aser metongshitsüla," ta Jha-isa metetdaksü.

Tanga opposition party balala nungi MP temia Jha pusema liasü.

Delhi nung Ayushman Bharat scheme mapa küma benoktsü

New Delhi, March 13 (Agencies): Delhi nung BJP sorkari Delhi nunga Ayushman Bharat Pradhan Mantri Jan Arogya Yojana (AB-PMJAY) scheme mapa küma benoktsü atema March 18 nü National Health Authority den tezüngzüktep ka agitsü.

Iba health insurance mapa kümba benokba state/UT 35 bubaji Delhi akümtsü.

Ayushman Bharat scheme mapa küma mebenokba state ji West Bengal dang akümtsü.

"March 18 nü Union Health

Minister, J P Nadda lia tezüngzüktep ka agitsü aser iba scheme kübok tajangzük angutsü atema kibong pongu nem AB-PMJAY cards agütsütsü," ta Brihostibarnü ketdangser kati metetdaksü.

Delhi assembly election mapang nung BJP manifesto nung tenangzükba tongtibang onüktem rongnung iba scheme ya densema liasü.

Taoba mapang Delhi nung AAP sorkari Mohalla clinics dang lapoka liasü, ibayongji Ayushman Bharat scheme

benoktsü memelung.

February 5 nü BJP-i Delhi nung AAP sorkar atsüngdoka liasü.

AB-PMJAY scheme ajanga küm shia kibong ka nem sen lakh 5 jenjang health cover agütsür.

2024 küm October 29 nü Central sorkari AB-PMJAY scheme ajanga arrshi küm 70 ser temapur teintet sensotem-a ayimjemogo. Iba scheme kübok teintet sensotem nem küm shia sen lakh 5 jenjang angati treatment agütsütsü.



March 13, 2025 nü New Delhi nung Delhi Chief Minister, Rekha Gupta-i Rohini kiyong nung aliba 'Asha Kiran Home' orphanage nung tanurtem den jelia Holi benjung amongdang tangokba noksa nung angur.

Muslim nunger MLA tem assembly nungi meindoktsü: Suvendu

Kolkata, March 13 (Agencies): West Bengal nung opposition lenir, Suvendu Adhikari-i, sangküm Bengal assembly election nung BJP-i takok ngua sorkar akümba sülen BJP-i Muslim nunger MLA tem assembly nungi meindoktsü, ta jembir.

Chief Minister Mamata Banerjee-i aniba Trinamool Congress party-i Suvendu-i jembiba oji aija, iba ta tesempa o lir, ta metetdaksü.

February 17, 2025 nungi tenzüka budget senden metembang tashi BJP MLA, Suvendu assembly nungi anentsüogo.

Mongolbarnü assembly kima osangbenertem den jembidang Suvendu-i, Mamata-i aniba sorkar ya telemsa adokdaksüba sorkar ka lir, aser parnoki Muslim League tanabuba telok ka ama inyaksangshir, ta aija liasü.

"Taruba election nungbo Bengal nüburtemi parnok tera nungi atsüdoktsü," ta pai ashi.

Trinamool Congress otongdar, Kunal Ghosh-i, kasa MLA tem anema tashishitsü o

jembiba ya nüburtemi shimba lenir ka memesük, ta aitsü.

Suvendu-i jembiba o aija Ghosh-isa, "Parliament mesüra state assemblies nung o enteptsü aser tokteptsü akok. Ajisüaka yimsü tetshiba aser yimsü kar amanger MLA tem anema jembiba ya linük temzüng nung aliba tangatetba anema lir. Iba nung ya lendong keta lir. Iba ya ozüng alema aibelenba lir," ta ashi.

Suvendu aija Mamata-ia, "Hindu nunger aser Hindu yimsü kümzüksüji kü teinyaktsü mapa lir, ajisüaka nü tangatetba amaji masü," ta ashi.

Laisa, "Komaser ner leniri (Adhikari), assembly nungi Mulim nunger MLA tem meindoktsü ta jembir? Kodaser nenoki linük nung nütsüng shilem 33 sendoker?" ta asüngdang.

"Item ama o jembisangi tarutsü nungbo sasatsü. Pai party melenpet dang melener. Congress nung liasü, iba sülen Trinamool nung aden aser tang BJP nung lir. Tarutsü nung tanga party nung adentsü atema pai mepishitsü," ta laisa aitsü.



March 13, 2025 nü Kerala kübok Kottayam nung Mahatma Gandhi'er tanaben semchir, Tushar Gandhi-i osangbenertem den jembidang tangokba noksa nung angur. Tushar Gandhi-i RSS anema jembiogo anungji pai item oji meyipa agitsüla, ta shia RSS-BJP züngsemtemi pa dang tatok meshitsü akhanger.

Arrshi küm 0-6 tanurtem shilem 17 bo temang touzük kanga ajemer

New Delhi, March 13 (Agencies): Sorkar indang 'Poshan Tracker' data ajanga ashiba agi, February ita tashi nung arrshi küm 6 ser tekübokpur tanur crore 8.8 Anganwadis nung register süa liasü; iba nungjagi tanurtem shilem 37.7 bo tekongra/tar tatsü aser tanur shilem 17.1 bo temang touzük kanga ajemer liasü.

Rajya Sabha nung tasüngdangba ka langzüdang Ministry of Women & Child Development-i iba osang ya metetdaksü.

Poshan Tracker aser National Family Health Surveys 1 (1992-93) nungi 5 (2019-21) nung ajemdaker WCD ministry-i, iba ya ajanga India tesem balala nung tanurtem chiyungtsü agi matuba dak sendakba jenjang tajungba akümba sayur, ta ashi.

Minister of state for women & child development, Savitri Thakur-isa, 2021 küm tashi nung arrshi küm 5 ser tekübokpur tanur nütsüng crore 13.7 aser arrshi küm 0-6 tanur nütsüng crore 16.1 shi liasü, ta metetdaksü.

Taküm February ita tashi nung Anganwadi aser Poshan Tracker nung register asür arrshi küm 5 ser tekübok tanur crore 7.4 liasü aser iba nungjagi tanur crore 7.2 aso-ajen aser temang touzük asadangogo, ta laisa metetdaksü.

"Item tanurtem shilem 39 tekongra/tar tatsü, shilem 16.6 temang touzük kanga ajemer liasü aser tanur shilem 5.3 tashimait liasü," ta minister-i metetdaksü.

National Family Health Survey-5 (2019-21) nung, arrshi küm 5 ser tekübok tanurtem shilem 35.5 tekongra liasü, shilem 32.1 temang touzük kanga ajemer aser tanurtem shilem 19.3 kanga tashimait liasü.

National Family Health Survey-5 (2019-21) denji medemdangra arrshi küm 5 ser tekübokpur tanurtem health jenjang kanga tajungba kümogo.

NFHS-i küm 5-6 nung khen dang kibong lakh 6.1 shi nung iba survey agir aser Poshan Tracker-ibo ita shia tanur crore 8.5 shi survey agir, ta laisa metetdaksü.



TIR YIMYIM YIMOBILEM (EDITORIAL)

DIMAPUR FRIDAY, MARCH (METSÜREMI) 14, 2025

CM aruba teimla

Anogo shia mapang agi magishir, saka anogo ka songtema aruagi Tuli nung nübortem ajurua amongtsüsa yakanü Chief minister Neiphiu Rio-i Tzüdikong aser Wameken semdangbaji Mokokchung district purtem asoshi teimla bener arutsüba osang tajung ka asütsü. Pai agütsüba teimlaji Tuli paper mill tanaben asentenshia lapoktsü aser tang Tzüdikong anasa tashi ka khu abenba train atuya aliba ya nisung amenba train dena senzütsüsa inyaksütsü nangzükbatemji asütsü. Atangji, itemji dang masü saka pai ano tenemtsüng lenmang yangluba dena tsüngdong oagi reprangba jagi memenui asangsang nung tenemtsüng lenmang nungji asenok jajattettsü ta teimla agütsür. Taoba kümtem nungbo Ao kaketshirtemi parnok mungdang nung tongti tesemdang asütsü maongka agüja jaokaka anaben asemben tashi arutsü nangzüker maru, saka tangbo pai apiteta Tuli tashi arua nübortem ajangzüksüba mapatem asentenshia inyaksütsü nangzüker aoba jagi pa dak temelenshi tajung ka reprangteter. Atangji, asen lima renloktsüba Chief minister kisüng dak imlatsüba masü saka asenoki asenoksasa renloktettsüla. Ajisüaka, terenlok mapa inyaka otettsü atema government tashi aser temoatsü nungdaker, kechiyong asenok nübortem kijai gari jajatsü atema National aser State Highway-tembo meyanglutetsü, electric light-a nübortem kisüng tashi agibo madokdaksütettsü, kasaji train aser tayimtsü arua anentettsüsa inyaksüba Chief minister mapa lir, anungji chief minister-sa tsüngdong maruaka asenoka asenoki shimtetba lenir tajungtem lir, anungji parnok den shisalemsatepa terenlok mapa inyaksü asoshi asenoki sentong yanglutetra, itemji parnok ajanga chief minister dang masü saka Delhi atongtsü tashi aser teimla lir. Atangji, tangar asünungbo inyakteter alitsüba mapa kaji Amguri nungi Tzüdikong tashi dang masü saka Tsüngsangra lenden tashia jenjang dalang agi train asenok mener oli aruli jajattettsüsa inyakteter alitsüba ser nung meinyaktetba agi Chief minister-i inyaksütsü nangzüker ogo. Atangji, CM-i nangzükbaji mapa tesadang kabo atem amai bilemer, ajisüaka asenoki temulung magütsüra train-ji asen limai atutsü melen taluang alutsü. Tanü asüngbo pei gari bener anogo piyong totzü nung sen endokerang temang belema senzütsü melen aikati train aser tayimtsü nung dang oli aruli ta jajar. Ibaji meteta nisung amenba aser khu abenba train ya Tzüdikong alema Tului tashi atutetra memenui train lenmang jagi Mokokchung atongtsü. Iba atema Tuli Area Development Committee aser Business Association of Nagas purtemia Guwahati tashi oagi Railway nung tulurtem ajurua senden amenba osang asenoki angashiogo. Aji oda, parnokia ano maneni Railway ketdangsertem aser Chief minister nungertemji ajurua inyakra, kiburi pei mapa meteta inyaker asütsü, anungji memenui teimlaji asangsang nung ataloktsü. Ajisüaka, nangzüka tamamangtsükaji Tuli paper tanaben lapoktsüba otsü ya lir. Aji oda, asenokia Tuli paper mill tanaben shia arudaksütsü Nagaland government den ken o renema jembiba telok 3ACSL den tongteprateptetra, idangjiang asenoki tejangjaba metettsü. Assam nungbo Jagi Road nung kasa HPC teloki lapokba paper mill-bo shibangadokogo aser iba kasa liji Assam government-i agiadokogo aser yangji tang Assam government-i lanurtem asoshi Artificial Intelligence, Semiconductor aser electronic mapatem sayudak TATA telok den külem ser lapoka lir. Ibajiang, ano, paper mill lapokba dang nungibo tajangzüker tuluba asütsü. Tuli paper mill ya tanaben lapokabo mangur saka lapoktet nunga tamalen ama asen nisungibo meinyaktettsü, anungji paper mill nung nungdabatem yoktetra asenok asoshiibo ajiang tajangzüker asütsüa akok. Aji oda, melapoktettsüba aser meinyaktettsüba mapa ka ataba dang nungibo Assam government amaji paper mill melen kasa tesem nungji lanurtem dang mapa sayudak riju ka lapoktsüa akok mesüra paper menüngba tesem ajakji okdoker ibajiang Railway station aküm nunga, asenok asoshiibo ibajiang tajungba asütsüa akok. Atangji, chief minister-i teimlabo agütsüogo saka iba teimlaji mapa akümtsü asoshiibo asenok dak tuluka keta lir.

OLEMSABANG

AROGO ASER YIMDEN: TEPILA ASER TESENDAKTEP

~ Wati Longchar (Eralibill)

(Yashi adok nungi...)

Kuli kar:

- Alima yimli aser Tsüngrem yimli naji balala ta Yisui sayu (Lk 19:10-11). Saka meimchir shia yimli anaprongla nungji senso kaka. Senso kaji yimden ozüng anaprongla kübok alir. Baptist arogo aika nung tenlaki sabang nung flag ana - ka nung kangki aser ka national flag ayur. Ibaji ajanga nübu shia senso ana ta sayutsü asoshi. Alima yimli künü tembanga arutsü, saka Tsüngrem yimli teti asoshi alitsü; alima yimli alinük telongtet (limited space, e.g. India, China) ka asür, saka Tsüngrem yimli alima rangpen (whole universe), tasazük mali; alima yimli ozüng agi azüoka ayur, saka Tsüngrem yimli temeim aser ochi agi azüoka ayur; alima yimli nung takar-makar, yimsüsür-tanitaker ta telemsa ayur, saka Tsüngrem yimli nung telemsa mali. Yamaji yimli anaji sendaktepa saka tepila bendanga ayu. Yamaji yimden ana arla balala. Yimden ka madak kati teka amokbaji tim masü, saka koba yimden nung sudir suang (arogo mesura alima yimden), teinyakeri aibelenra parnokji loktii mulunga lemtetba ozüng jagi alentsüla.
- Yimden latetji Tsüngremi yanger. Senso shia yimsüsüba kübok (alima yimden) alitsüla kechiaser Tsüngrem nungi yimsüsüba tashiji angur aser yimsüsüba bangdakji Tsüngremi latettsüba lir (Rom 13:1-7; Mt. 22:15-22). Tsüngremi kechi ochi jungkai adoka sayu iba tesayuba kübok tashi anga yimsü asütsüla (Mt. 10:28). Ochishir yimsüsür akhümtsübuttsüla, saka ochimashir yimsüsür dang tarttsüba o ashitsüla aser yanglushitsüla. Tetezü, yimsüsüba mendenji temeshi. Ochi yimsüsüri tamangba nung ochimashi inyakyim adokdang temetongshi agütsütsü shilem kar, kechiaser arogopur ajak alima yimden senso kaka lir. Arogo aser tanga telok nung ozüng anema aibelenertem merenshitsüba yimden ka khuret aser teinyaktsü.
- Iba lima nung Tsüngrem yimli yangertsü arogo nem nunglokttsü. Alima yimden nung aiben mangatettep, mezüngmeshi, sensaker, meshimejunger sendoka yutsüba, ochimashi mapa ajanga mesura ashiokttsütep ajanga tesendaktep raksa aliba yanglushitsü aser teputep adokdaksütsü? arogo jatet. Anungji arogo tashiyim aser mangyangba mapa nungi pilaa ali nung dang alima yimden anema ainkar ola agütsütet aser teputep kuli sütet. Yimden lenir mashilen jajadang temelenshi aser tarttsüba, nuburtem item ochimashi lenir anema ajungjongmesotsü arogo khuret aser teinyaktsü.
- Tsüngrem yimli nung kecha tebandang mali, ajak kasa, senti aser meimchir ajak Tsüngrem mesükba nung yanglu. Grik nunger aser Yihuda nunger, temejeptokba aser memejeptokba, Barbar nunger, Sitia nunger, alar, nüchi ta telemsatep kecha mali (Kol. 3:11). Arogoi Naga nunger, tzümar, tanak-temesüng, tetsür-tebur ta melemsai ajak sakü nüchi asoshi inyaker. Saka alima yimdeni yamaji meinyaktet. Meimchir rongnung, nation-state tsüngda lendong adokdang arogoi teimla bener arutsür.

Yamaji arogo yimden aser alima yimden sendaktepa lir saka tajaba balala lir. Tali terajemba angatettsü asoshi yamai arogo aser yimden tesendaktep aser tepila arla metetdi:

Alima Yimden aser Mapa	Arogo Yimden aser Mapa
Political party balala tenteta yimsü asür	Political party mali. Tsüngremi jangja jangja ajatetba purtemi arogo nung tenzüker
Mapang tatakzük ka dang yimsü asür (Tatashim küm 5 tsüngda shia agir – democratic world)	Tsüngrem yimli yimsüsüba tatem maka.
Alima yimli country, state ta lemsar yimsü asür	Alima rangpen, boundary mali, meimchir rongnung telemsa mali
Temzüng yanglua nübur azüoka ayur	Laishibaji Temzüng tulutiba aser Lai tesayuba ajanga nüburtem yimjung nung ayutsü sayur
Nübur madak tashi amshir	Nübur temeim agi tenzüker
Ozüng lateta iba jagi azüoka ayutsü ozüng agütsür	Temeimji ozüng tulutiba aser aji inyaksü ajungshir
Takok angutsü asoshi tashiyim aser sen amshir	Takok angutsü asoshi mapa meranga inyaker, ochi inyaker aser temeim sayur
Lokti terenlok asoshi mapa inyaker	Shi taküm aser tanela taküm tekümzüker anaprong asoshi inyaker
Pei tajangzüker bushia mapadong aser mapa aika inyaker	Khristar arogo, nütüng aser alima meimchir rangpen tajangzüker asoshi inyaker

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agütsü mepishir



2024 küm December 24 nü Catholic Bishops' Conference of India (CBCI) nungi lenirtemi Ato kilonser, Narendra Modi ajurudang tangokba noksa nung angur.

US nung Khristan nütsüng ajema akümba anenogo

March 13, 2025: Tesüiba küm aika US nung Khristan nütsüng ajema aküm, ajisüaka joko US nung Khristan nütsüng ajema akümba anenogo, ta Pew Research-i agiba Religious Landscape Study (RLS) report ajanga metetdaksü.

Iba survey nung America nunger tain 36,908-i shilem agia liasü, ta Lifeway Research-i metetdaksü.

"Largest study of religious identification & practice in America" ta ajaba report nungji America nunger Khristantem indang osang tejangja metetdakja lir.

1990s mapang nungi tenzüka 2018 küm tashi US nung Khristan nütsüng ajema aküm, ajisüaka 2019 küm nungi tenzüka US nung Khristan nütsüngji shilem 60 nungi shilem 64 tashi liasü aser tang nütsüng shilem 62 Khristantem

lir.

"US nung tamangba yimsü dak sendakba study balala ajanga 1990s nungi 2000s tashi nung Khristan nütsüng ajema akümba bushiteta liasü," ta Lifeway Research nungi Aaron Earls-i metetdaksü.

"Tang tesüsa Pew Research densema study balala ajanga Khristan nütsüng ajema akümba anenogo ta bushiteter. 2019 küm nungi Khristan nütsüng shilemji 60 nungi 64 tashi lir.

Tesüiba küm aika Khristan nütsüng ajema akümbaji tamalen Religious Landscape Studies ana ajanga bushiteta liasü. 2007 küm RLS study ajanga, America nunger nisung 4 shia nungi nisung 3 bo (shilem 78) Khristantem liasü. 2014 küm tashi nungbo shilem 71 dang aküm aser tang shilem 62 Khristantem lir," ta Aaron-i metetdaksü.

"Na kechi yimsü amanger, ta asüngdangba mapang nung America nunger nisung 10 nungi asemibo parnoki Tsüngrem dak mamanger, Tsüngrem lir asü maliar memetet mesüra kecha yimsü mamanger, ta langzürtem liasü," ta Aaron Earls-isa metetdaksü.

"RLS study ajanga, kecha yimsü mamanger, ta ashirtem arenba anenadokogo ta bushitet. Tang yimsü dak sendakba tensa ajanga Arogotemi teinyaksü wadang jangjatsü," ta pai ashi.

US nung nütsüng shilem 40 Protestant Khristantem lir; 2007 küm nungbo Protestant nütsüng shilem 51 liasü.

2007 küm nungi tenzüka Evangelical Protestants shilem asem dang ajemogo. Tanak nisung Protestant-a shilem 7 aliba nungi shilem 5 dang kümogo.

ANOGO ABEN TSÜNGREM DEN

Sarasadem tashi

"Aser Jabezi Israel Tsüngrem dang jaa ashi, Oba, nai ni moajang aser kü litsü ulushidakjangma, aser ne ket kü den liangma. Aser ni mejashitsüsa nai ni timtem nungi sotangma! aser pai kechi asüngdang Tsüngremi aji mela" (I Puti 4:10).

Jabez ya Yihuda (Yakober jabaso pezübuba) nungi jakzüka aruba lir. Par kibong nung pa akum taket züngsem ka liasu. Saka Jabez tenüng tetezü ya tamajung lir, koba tetezü timtem tejashi. Item ya liaka pai pa sasa teimla nung Tsüngrem dak tamang kaa sarasadema liasu. Pai Tsüngrem dang tongtipang ana temaotsü aser ali meshia sarasadem. Aliji Tsüngrem indang rongsen lir aser shirnok Pai sabur parnok nemji ali ya aguja liasu, anungji Jabezi ali asoshi sarasadem. Iba sulen pa sarasadembaji timtem nungi agienjang ta sarasadem. Kechiyong pa tenüng nung tetezü keta ajab atakatemi koktettsü asoshi pai Tsüngrem dak amanga mepishi. Jabezi kanga nendaka Tsüngrem dang akümtsübua sarasadema liasu.

Aiben asen sarasadem ya tetezü melii aser kechi asoshi sarasademer, nükjidong kechi, junga memeteti sarasademer. Tsüngremi Jabez sarasademji agizüka liasü. Tanua kasa Tsüngrem jagi pa chirtem asoshi temoatsü lemsatsütsü asoshi mulunga lir. Pa tashi jungkai adoka sayutsü asoshi asen asoshi rizünga lir. Anungji, aseni Pa dang akümtsübua mepishidi. Shinoki tila kuma sarasadema mepishir, Pai parnok olaji angashir aser noklang bena moatsür, saka shirnoki takümüj pei sasa alir ama ulua bilema asükümer, Pai parnokjibo tesülen nungia mereprangner. Aji oda Mati 5 nung ashir, ajemalurtemi alima senmang amangtsü. Süra tanü nai-a koda sarasademer ? Pai ne ola angashitsüsa na tila nai mepishidar ma ?

India nung Khristantem anema inyakba pezüben agi tali kümogo

March 12, 2025: India tesem ajaklen Khristantem anema inyakba kanga bulua akümer, aser tesüiba küm 10 tsüngda India nung Khristantem anema inyakba pezüben agi tali kümogo, ta Evangelical Fellowship of India's Religious Liberty Commission (EFIRLC)-i metetdaksü.

EFIRLC indang report "Faith at Risk: Examining Violence and Discrimination Against Christians in India" ajanga ashiba agi, 2024 küm kija nunga India nung Khristantem anema inyakba tatalokba 640 liasü aser iba denji medemdangra, 2014 küm nungbo Khristantem anema inyakba tatalokba 147 dang liasü.

Evangelical Fellowship of India (EFI) General Secretary, Rev. Vijayesh Lal-i, "Reshikangshiba tatalokbaji ishika dang masü aser item ya asalentong yanglur inyakba amai lir, aser ibajji ajanga India temzüng kübok tamangba yimsü temeden amokmerener," ta ashi.

"Khristantem anema inyakba tatalokba ken otemji iba dang nungjagi kanga agia teimba asütsüa akok, kechiyong talisa

yimtsüngtem nungbo takoksa angurtemi item ama osang lemsatepsü tsübur," ta Rev. Lal-i metetdaksü.

2024 küm Uttar Pradesh nungbo Khristantem anema inyakba tatalokba 188 liasü. Iba sülen tanabuba state ji Chhattisgarh (tatalokba 150) lir; iba sülen Rajasthan (40), Punjab (38) aser Haryana (34) state tem lir.

EFIRLC report ajanga ashiba agi, India tesem balala nung Khristantem dak azüker, tekülem sentong tagidak mapang timtem agütsür, Tenla ki raksatsür, Khristantem loktiliba nung sendoker, yimdak-yimtsüng nung maongka balala magütsür, anti-conversion ozüng kübok apur aser kidang nungi meindoker.

Yaküm December 27 nü Uttar Pradesh kübok Fatehpur district nung Pastor Shivbharan dak azük, kou ongdoxü aser yimdong süa anir jaja liasü. Shidakba agibo ketdangsertemi pa nem security agütsütsüla, ajisüaka pa anema anti-conversion ozüng kübok ken o benok.

Yaküm January 23 nü Punjab kübok Jalandhar

district nung Pastor Bhagwan Singh leniba nung sarasadem sentong agiba mapang nung pa dak azükba ajanga pa tekolak kanga mejungi yirua liasü. Iba sülen ita ka shi lir February 19 nü pa süadok.

Osangbener den jembidang Rev. Lal-i, "India tesem ajaklen anogo shia Arogo mesüra pastor 4-5 anema inyaker aser Amongnü tekülem sentong tagidak mapang timtem agütsüba tatalokbatem anasü agi teimba kümogo. Iba ama tatalokbatem ya yimsü nokdangtsü aser tsübudaktsütsü nükjidong nung lir," ta metetdaksü.

EFIRLC-isa, aiben takoksa angur Khristantemi ochi temeden mangur aser aikati tsübuba agi item ama osang melemsateper, ta metetdaksü.

Khristantemi item ama tatalokba anema ken o benokyonga ken o angadangtsü mapang kanga atsülander, aibelenertem maitsür mesüra ken o benokertem ang aija tepuokdak ayur, ta kasa report ajanga metetdaksü.

Evangelical Fellowship of India (EFI)-i India sorkar dang, amokmeren tia nung aliba

Khristantem nem police Religious Liberty security agüjang, aibelenertem Commission indang report nem temerenshi agüjang, anti tejangjaji Evangelical conversion ozüngtem Fellowship of India indang yanglushiang aser okadak ken website nung angutsü.

o ochishia angadanga India nung Khristantemi obendang agüjang, ta taküma-a reshikangshi maneni agütsü. alitsü aser ano tamajungba

1998 küm nungi tenzüka dang akümtsüa akok, ta EFI indang Religious Liberty Khristan melungtet telok Commission-i India nung Release International (RI)-i Khristantem anema inyakba metetdaksüogo.

RI indang 'Persecution Trends' report ajanga ashiba agi, India nung Khristantemi linük nung yimsü temeden jenjang majungba atema tsübua küm tasen tenzük, ta metetdaksü.

"State aika nung anti-conversion ozüngtem ajanga tamangertem kongshir. Item ken o nung tai tonglokja linük tesem balala nung Khristan lenirtem aser pastor tem 300 shi jail nung puoka lir ta asadangteter. Ano takümsa tamajungba asütsü ta parnoki tsübua bilemer, talisa Khristan

tetsürtemi timtem taliba ajangshitsü aser Khristantem sademsadema tekülem magitetsüsa ketdangsertemi inyaksüa akok ta bilemer," ta parnoki metetdaksü.

AO OSHI ANGAZÜKDAK:**TANÜ ANGAZÜKTSÜBA OJANG****Telangzür**

(n) tasüngdangba o meyipa agütsür (respondent)

* Okadak obendangeri asüngdangba o telangzür mali asü.


Telatet

(n) ken o renema ayuba (resolved)

* Asenoki sobaliba temzüng özüng telatet benshitsü meranger.



Tir Yimym

OLONG PAITEP # 7090**TIPIEN**

2. Teburtemi tejak nung awaba
6. T _ _ _ em
8. Tzüik ayudak
9. Nüngdakba dang timba
11. Züina ao
12. Yangi tzü angur
14. Tangar dang nungi tali
16. Senyong masü
17. Oadokdi
18. Tzü tarok
19. Yimtaklir aikati iba ya ki den
külemi yanglusemer

LANGTSÜNGLEN

1. Temejangdak
3. Nisung ka mapa inyaksü nübo
4. Azüntsü asoshi mejemba
5. Tesangwa agütsüba
7. Tila masü
10. Tebenjem tetsür chanu
11. Tekolak nung inok
12. Tetsüngda
13. Tangar inyakba ka inyak
14. Tim masü ta ashi
15. Asalendong
16. Tanü dangtsü

OLONG PAITEP # 7089 TELANGZÜBA**TIPIEN :**

1. Telok, 4. Aluru, 6. Ozüing, 8. Emk,
9. Kin, 10. Teti, 12. Süir, 13. Jen,
14. Ola, 16. Talak, 17. Mazük.

LANGTSÜNGLEN :

1. Tenükjang, 2. Luden, 3. Kioktsü,
5. Lenti, 7. Tajangzük,
11. Teronem, 12. Sempa,
13. Jahaz.

NAI-A YA METETTER MA**ICC CHAMPIONS TROPHY NUNG GOLDEN BAT ANGURTEM:**

- 1998: Philo Wallace; West Indies
2000: Sourav Ganguly; India
2002: Virender Sehwag; India
2004: Marcus Trescothick; England
2006: Chris Gayle; West Indies
2009: Ricky Ponting; Australia
2013: Shikhar Dhawan; India
2017: Shikhar Dhawan; India
2025: Rachin Ravindra; New Zealand.

Assam: Sübokrem agiba atema education ketdangsürtem apu

Guwahati, Metsüremi/ March 13 (Agencies): Assam nung Directorate of Vigilance and Anti-Corruption-i sübokrem agiba ken o nung aija education ketdangsür ana puogo, kong sen 50,000 akhangba densema lir.

Narayanpur, Lakhimpur district kübok BEEO office nung Senior Assistant kati tashishiba agütsüba sülen Block Elementary Education Officer (BEEO) Padmeswar Bora aser Rongpur Betani LP School Head Teacher Mahim Debjit Saikia na pua liasü.

Ken o ashishiri ashiba agi, ken o benoksa suspend sütsütsü aliba nungi kümzüka toktsütsü atema Bora-i sübokrem meshia liasü.

Complainant-i tashi mangaba sülen pai ken o ya Directorate nem metetdaksü aser iba sülen bushisügang tenzüka liasü.

March 12 nü Directorate-i BEEO office nung aibelenertem aputsü atema tasa ka asa liasü. Saikia ya impartial witnesses matsüingda sübokrem 10,000 agiba puteta liasü.

Directorate-i iba sen ya apu aser iba inyakyim nung

densema aliba atema Bora dena pua liasü.

Meita aoba sentong ayongzüka agiba mapang kuli bendenba dak ajemdaker ketdangsürtem ya pua liasü.

ACB Police Station nung BNS Section 61(2)(a) aser Prevention of Corruption Act, 1988 (amended in 2018) Section 7(a) dak ajemdaker FIR ka benokogo.

Directorate-i ken o maneni bushisügangdangba mapang temzüng özüng dak ajemdaker maparentem maneni benoka inyakdar.

Meghalaya: NEHUTA-i VC Shukla aitsü

Shillong, Metsüremi/March 13 (Agencies): NEHU nung tang mepetmesü adoker aliba ya university professors tem dak tai tongloksüba sülen NEHU Teachers' Association (NEHUTA)-i Vice Chancellor Prabha Shankar Shukla aitsüogo.

NEHUTA tir Lakhon Kma-i Bodhbarnü, NEHU indang ken o bentettsü atema Shukla dak academic tsütsü nungi tashi mali ta ashiba den ken o dak sendakba nung tejak o tejak na chitepa sensak asemtsü pa jazükogo.

Government of India leave rules, UGC Regulations 2018, aser NEHU Act densema temzüng özüng balala nung aibelenba atema Kma-i Shukla aija liasü.

Pai ashiba agi, Shukla-i küm asem ser tesadang Vice Chancellor mapa inyakba ya tamakok agi sünga lir, kong Registrar aser Deputy Registrars densema tongtibang mapatem atema temsüa



malirtem shimba aser faculty züingsem ama mapa nungi anener alirtem shimba densema lir aser iba ajanga pa tamakok dangi ania liasü.

Kma-isa, Meghalaya aser Northeast tesem nungi temsüa alirtem meshimi Shukla-i tesem ka nungi dang candidate tem shima liasü, ta ashi.

Shukla-i, bushisügangdangsü majungmesor aser temsüa aliba faculty tem mapa nung temaba jenjangi majungketsü aser iba ajanga NEHU indang rank tejamba kümдар.

Paisa, tejak repranga inyaksangshiba aser temzüng özüng sülen manidakba atema Shukla aitsüogo.

Maneni NEHUTA, NEHUNSA, aser NEHUSU amala lokti tentetemi temetonshitsü benokba magizükba atema Kma-i Shukla aitsüogo.

Shukla-i inyakyim anema inyakasangshiba dak sendakba nung inquiry committee indang report ya tang Ministry of Education-i lepa reprangshidar.

Kma-i ashiba agi, Shukla shiba anogo 130 leave nung lir, pa Shillong nung NEHU headquarters-i meyipa maru lir.

Paisa, Shukla-i pa tenüing memenüksü atema jenjang agidar aser kasa mapang nung NEHUTA bo university ajangzükdaktsütsü atema bendanga agütsür lir aser pa inyakyim ya nüburtem nem dang obendangdaksütsü toktsüogo, ta ashi.

Manipur: KCP tesepe ka maktok; telungpur 5 apu

Imphal, Metsüremi/March 13 (Agencies): Taoba ghonda 24 tsüingda central aser state force tem longjemer Thoubal District kübok Heirok Part-III meita aoba mapang telungpur tesepe ka nguteta maktokogo aser telungpur telok ana nungi züingsem pongu apuba den prangbong injang aika ngutetogo.

Sepaitemi Heirok-PS, Thoubal District kübok Krishnadas Farm House anasa Heirok Part-III, Uyokching nung amenoka aliba camp nungi KCP (PWG) cadre Laishram Boinao @ Boi @ Laingam (36) pua liasü.

Tanabuba meita aoba sentong nung police-i KCP

(PWG) züingsem Khongbamtabam Nanao Meitei @ Khanganba (25) aser Kshetrimayum Roshan Singh @ Killer (25) na Imphal East District nung pua liasü.

Police-isa, Imphal West District nung KCP (City Meitei) züingsem, Soibam Inaocha Singh (24) aser Thongam Deepak Singh @ Inao (36) na pua liasü.

Item telungpurtem ya taoba ita ishika tsüingda Manipur kübok lenden lima nung rakzükrakdemba aser özüng alema inyaksangshiba maparen balala nung shilem agia liasü.

Spaitemisa, .303 LMG ka den magazine ana, SLR magazine ka,.303 injang 46 aser SLR injang 20 item telungpurtem

ket nungi nguteta liasü.

Maneni sepaitemi 36 HE grenades ana, handheld radio sets ana, bulletproof plate ka den BP vests asem ngutetogo. Iba den bendenloksema parnoki KCP (PWG) indang line seal ka aser stamp pad ka, camouflage korang ti aser KCP (PWG) indang yangku ka ngutetogo.

Ketdangsürtemisa, backpack tenet, sleeping bag asem, camouflage shirt ter, camouflage trouser ana aser camouflage jacket ana nguteta liasü.

Trousers 17, jacket pezü, T-shirt pezü, slipper ka hoodie ana, scarve ana den pakti ka, mobile handset pongu aser sen 1,200 security force temi nguteta liasü.

**GOVERNMENT OF NAGLAND
DIRECTORATE OF TECHNICAL EDUCATION
NAGALAND : KOHIMA-797004**

NO.DTE/SCHO-10/2024**Dated:Kohima, March2025.****NOTIFICATION**

This is to inform all the students belonging to Scheduled Tribes of Nagaland pursuing Diploma/Undergraduate and Post graduate courses in Engineering, and applied for State Technical Scholarship (both Fresh & Renewal) to submit the hard copy of the form uploaded online for the session 2024-25 to the office of the undersigned on or before 31st March 2025.

**(VIPULHOU LHOUNGU)
Director.**

BLA-i train hijack asüba sülen

Pakistan PM-i Quetta semdang

US lenirtem Ukraine indang jembitsü Moscow tongogo

Quetta, Metsüremi/March 13 (Agencies): Pakistan Ato Kilonser Shehbaz Sharif-i Brehostibarnü Balochistan province semdang aser iba mapang security force temi train hijack asür telungpur nisung 33 tepsetba sülen kumzükba nisung kar Quetta-i aru.

Mitkar temi iba train azüngtettsü merangba maparen temogo ta shiaka iba timtem agütsüba Baloch Liberation Army (BLA) telungpur telokibo tang tashi maneni raratar aser parnok ket nung hostage tem lir ta ashir.

Mongulbarnü Jaffar Express train ya Quetta nungi Khyber Pakhtunkhwa province nung aliba Peshawar leni aodang telungpuri rail tracks poksatsür injang khaloktsü.

Telungpur temi iba province agitsü asoshi küm aika sorkar den rara arur, kong China-i anir rongnendak, hon aser copper atuba project tulu jenti lir.

Train lenmang poksatsür mitkar den khatepdang hostages 21 aser security züngsem pezü tepset ta mitkari ashir, saka BLA-i hostages 50 tepsetogo ta ashir.

Sharif-i anogo tepiyong Quetta semdangba mapang region nung security tensa asadangtsü, ta sorkari ashi.

Pai Bodhbarnü social media X nung train amakba aitsü aser iba ama tasü mait mapa ajanga Pakistan yimjung asoshi temulungtetba manokshitsütsü ta ashi.

Ketdangsür temi local railway station kati nisung tasü mang 25 bener aruogo aser iba tesem nungi Quetta-i ambulances nung bener aotsü ta ashi.

Pakistan-i kümzük ta jembiba nisungtem ya ozü teloki chiokba lir, ta BLA ajanga ashi.

"Tang sorkari hostages tem asütsü yutsür asünung, parnok asüba khuret parnoki abentsü," ta iba telok indang odongtar Jeeyand Baloch-i Brehostibarnü sangdong ka nung ashi.

Baloch political prisoners, activists aser mitkar temi pua bener aoba samar aliba nisungtem ghonda 48 tsüngta mechiokra hostages tem tepset tenzüksü, ta BLA-i amokmerena lir.

Rocket launchers, prangbong aser danga nok-nü bena aliba nisungtem Mongulbarnü train telungi aita nisung dak akha tenzük, ta Arslan Yousaf-i ashi, shiba train nungi security forces temi kumzüka Brehostibarnü Quetta-i meiner arur tem rongnung dena liasü.

Telungpur temi train nung aliba passenger tem pei region telemsa nung ajemdaker telong tendaktsü. Parnoki sepaitem anir oa tepset, ta iba train nung sodi agir senzüa aliba Pakistan Army aser danga security forces tem indang pai ashi.

Parnoki nisung tejangja kar dak tenük yok aser tejashiba alir dak yangjisa injang khaloktsü.



Steve Witkoff

Moscow, Metsüremi/March 13 (Agencies): Ukraine den ceasefire alitsü atema jembishinütsü asoshi US ketdangsürtem Moscow tongogo.

Anogo 30 ceasefire atema Russia mesüzüksü meranga jembitsü asoshi special envoy Steve Witkoff Brehostibarnep tonga aru, koba Ukraine-i hopta tetenzüklen US den jembidang mulunga agizük.

Kremlin odongtar Dmitry Peskov-ia US den jembishinütsü sentong lir ta shia liasü saka, "Asenok jelia mejembi atati, onoki khen lir ashitsü," ta ashi.

Russian mitkar temi Sudzha jila tanaben agiogo ta sangdongba mapang America nungeri semdang. Sudzha ya Kursk region nung tongtipang jila ka lir, koba Ukraine-i taoba küm aoksa amakdang amokbanga liasü.

Tir Vladimir Putin-i Bodhbarnü Kursk region semdang aser mitkar tanishirtem ajuru, shirnoki pa

dang Russian sepaitemi iba tesem shilem 86 tanaben agiogo aser Ukraine sepaitem aridokmatsü tatemleni arur ta shia liasü.

Mongulbarnü Jeddah nung US aser Ukraine tsüngta jembishinüba sülen, iba "positive proposal" agizüktsü atema Russia mesüzüksü US dak keta lir, ta Ukraine Tir Volodymyr Zelenskyy-i shia liasü.

Yashi (Bodhbarnü) US Secretary of State Marco Rubio-i iba mapa asangsang akumtsü Russia dak keta lir aser iba rara tembangtsü lenmang ajak agi yimjung ken o jembitsü dang lir ta US-i amanger ta shia liasü.

Kremlin-i iba ceasefire tezüngzüktep asadangtar aser Trump aser Putin tsüngta phone ajanga jembitsü akok ta shia liasü.

Ceasefire atema osang tajung angazükogo, ta Trump-i Bodhbarnü ashi.

"Ajisüaka osang tajungji kecha maka. Iba tensa ya kanga majung," ta pai ashi.

Trump-ibo Moscow-i ketdangsür shirnok aor mashi.

Ajisüaka Press Secretary Karoline Leavitt-i White House nung osangbener den jembidang National Security Secretary Mike Waltz-i Russia nung kasa ketdangsür den jembioogo ta ashi.

"Onoki Russia dang iba sentong nung meyongnem agütsütsü ajungshir. Iba rara nung yimjung asoshi anasatibaji ibai alitsü," ta Leavitt-i ashi.

Oval Office nung Trump-i, ceasefire aliba ajanga Russia ajangzüktsü ta amanger aser Russia asoshia takoksa jenti lir, ta tongmelang agi ashi.

"Külen tensa kanga tepenja

ka kanga saka bentet. Yangji ali aser danga indanga jembioogo. Koba ali indangar onoki meteta lir, ainshitsü asüyonga, mesüra mainshitsü asüyonga," ta Trump-i ashi.

Russia ajungshitsü atema pai senotsü tsütsü mapa inyaktettsü, ta pai ashi.

"Ibaji Russia asoshi kanga majung asütsü. Ni aji meinyakner, kechiaser ni yimjung aginer," ta US tiri ashi.

Jeddah senden ya February 28 nü Zelenskyy, Trump aser Vice-President JD Vance nungertem White House nung asateper US aser Ukraine ketdangsürtem tsüngta senden mezüngbuba alitsü.

White House senden sülen US-i Ukraine nem mitkar teyari aser itdangiter osang lemsatepba anena liasü.

Ajisüaka Jeddah nung senden amenba sülen iba teyari anena aliba agien aser timtem nung aliba Ukraine nunger aser Zelenskyy-i tangbo yimjung aginer südi, ta Trump-i shia liasü.

Ceasefire atema jembishinü tesüdak süaka Ukraine nung rara tesashiba ang akumer.

Bodhbar aonung Russia indang drones aser missiles temi Zelenskyy'er ki aliba Kryvyy Rih jila aser rongnendak Odesa, Dnipro aser Kharkiv yimtitem amak.

Ano Russia indang Kursk region nunga maneni rarar, kong Russian sepaitemi takok nguyonga aor aser Ukraine sepaitem kübok aliba tesemtem tanaben agir, ta Peskov-i ashi.

Taoba küm August ita ajungbena Ukraine sepaitemi Russia anüolen Ukraine den arütsüa aliba region amak. Idangji khenbo Ukraine-i jila aser yimtsüng 100 agiogo ta sangdong, saka tanem tanemi Russia-i litsü timba tanaben agiogo.

Putin-i iba tesem semdang dang mitkar dang region ya jungjunga takenba nungi salatsü totuyuba agütsü. Pai tang tashi Ukraine aser US tsüngta Mongulbarnü ceasefire proposal agizüktepba nung telangzüba agüja mali.

Bodhbarnü Ukraine mitkar tekolakba Oleksandr Syrsky-i par sepai kar Kursk nungi ainshir ama shiogo. Telegram post ka nung, "Tensa tamajungtiba nung Ukraine sepaitem takum kumzüksü ya kü teinyaktsü liasü aser lir," ta ashi.

SANGDONGER

Mr. Alemtemsü Jamir (Longkong) S/o Lt. Lanumar Jamir, pai sen-o-tsü apuba aser ki, kimong ali jaman dak sendakba maparen kecha khuret onok adianutem aser kinungertemi mabener aser memetet ta sangdonger.

Kinungertem aser adianu tenüng nung,
1. Chubazulu, 2. Limawabang, 3. Tialiba

ALI TAYOKTSÜ LIR

New Showuba Police Station sülen @ Rs. 280 Per Sqft.

Contact : 8131884162



MINISTRY OF
CORPORATE
AFFAIRS

GOVERNMENT OF INDIA



GOVERNMENT OF NAGALAND



GOVERNMENT OF NAGALAND

GOVERNMENT OF NAGALAND

DIRECTORATE OF YOUTH RESOURCES & SPORTS

NAGALAND : KOHIMA

NO/DYRS/PMIS/YS-C/2025/

Dated Kohima the__ March 2025

In continuation to the earlier Advertisement letter NO.DYRS/YS-C/MISC/2013-25 dated the 6th March 2025 the Department of Youth Resources and Sports, Government of Nagaland, invites eligible candidates to apply for the Prime Minister's Internship Scheme implemented by the Ministry of Corporate Affairs, Government of India. This Scheme aims to provide internship opportunities to Youth in top 500 Companies in India.

Revised District wise Internship Opportunity offered in Nagaland in PM Internship Scheme-Pilot Project with addition of Wokha District with 11 Opportunities.

SL.NO	Name of the District	10 th	12 th	Diploma	Graduation	ITI	Grand Total
1.	Mon	1					1
2.	Dimapur	8		5	9	14	36
3.	Kohima	21				2	23
4.	Mokokchung	1			1	2	4
5.	Peren	1					1
6.	Phek	2					2
7.	Wokha			5		6	11
8.	Zunheboto	2		2	2	2	8
	Total	36		12	12	26	86

Internship Details :-

i) Duration : 12 months

ii) Stipend : Rs.5000 per month

iii) One-Time assistance : Rs.6000

Eligibility Criteria :-

i) Candidates must be 21-24 years old,unemployed and not full -time education.

ii) No family member should be a government employee or have an income exceeding Rs.8 lakh in FY 2023-24.

How to apply :-

i) Candidates are advised to carefully go through the Official guidelines before proceeding with the registration.

ii) Eligible Candidates must register at www.pminternship.mca.gov.in and complete the application process as per the instructions provided.

iii) Upon successful registration, Candidates are requested to contact the Department at 8974716323 for any assistance and to ensure smooth facilitation of their application.

iv) Candidates will be provided with Free Accommodation, fooding and Transportation during Internship duration.

Last Date for Application : 31st March 2025.

Sd/-
DIRECTOR
YOUTH RESOURCES AND SPORTS

Phek district nung archery coaching camp tem ayongzüka agidar



March 12 nü Government High School (GHS) Chetheba nung coach aser kaketshirtem tangokba noksa nung angur.

Kohima, Metsüremi/March 13 (TYO): Phek District Archery Association (PDAA)-i, sempet aketba lanur asayartem anitetsü aser district nung iba asaya ajungkettsü nükjidong nung archery coaching camp ishika ayongzüker agidar.

Osang ajanga ashiba agi, PDAA tir Dr. Chotisuh Sazo aser Vice President Razuvolie Dozo nati anir iba camp ya ayongzüka agidar aser certified NIS coach, Besuta Vero aser Khosazo Thisa nati school balala nung kaketshirtem nem tangazükba agütsüdar.

Camp nung mezüngbuba anogo asem ya Government

High School (GHS), Chetheba nung March 10 nungi 12 tashi agiogo aser Government Higher Secondary School (GHSS), Chozuba nung March 13 nung 15 tashi agitsü aser iba sülen Government Higher Secondary School (GHSS), Phek aser Government High School (GHS), Losami nung agitsü.

Iba inyakyim nongita yaritsü atema PDAA-i camp nung shilem agiba school tem nem tenügdakba training gear tem agütsüdar, kong buttresses ana, bow sets ana aser 80cm aser 122cm indang target faces ana densema lir.

PDAA-i taoba mapanaga

district nung archery asaya ajungkettsü atema jenjang agiogo. 2022 küm association, DLCW-Mahila Shakti Kendra (BBBP) aser District Administration longjemer Chozuba Government Higher Secondary School nung angati coaching camp ka ayongzüka agi aser iba ajanga Nagaland Olympic, North East Olympic, aser National Archery Championships nung medal angurtem anitetogo.

PDAA-i iba jenjang agiba nükjidongji archery asaya jenjang ajungkettsü aser lanur asayartem temaba jenjang nung tokteptsü atema sabang agütsütsü asoshi lir.

Mahmudullah international cricket asaya nungi anener

Metsüremi/March 13, 2025 (Agencies): Bangladesh nunger cricket asayar tejen Mahmudullah-i pa international cricket asaya nungi anentsü telemtetba agiba sangdongogo. Küm 17 asayaba sülen pa tang asaya nungi anener.

Arishi küm 39 tain asayari iba osang ya Bodhbarnü pa indang social media sabang balala ajanga mettedaktsü aser pai pa asayaba tepeyong nongita yariba atema teammate, coach, par kibong aser fan temdang kanga pelaba lemsatepa liasü.

"Ni international cricket asaya nungi anentsü telemtetba agiogo. Ni kü teammate, coach aser talisa fan tem dang kanga pelaba lemsateper, shirnoki ni teti nongita aruogo. Kü tsürapur, in-laws talisa kü father-in-law aser ajak dang tongtibangtiba kü adinanu Emdad Ullah dang kanga pelar, shibai ni tanur asüdag nungi coach & mentor ka ama aniteta liasü," ta Mahmudullah-i ashi.

Mahmudullah-isa, pa kinungtsü aser tanurtemi pa masetshi-i nongita yariba atema pelaba lemsatepa liasü, "tatamsa kü kinungtsü aser tanur tem

dang kanga pelar, shirnoki tia tensa ajak nung nongita aruogo. Raeid-i ni red & green jersey semer masayaba menongratsü ta meteta lir. Ajak kanga temsüa tatembang ka dangi marur, saka nai aji agizüka tejakdangi aotsü nüngdaker. Kü team aser Bangladesh cricket tarutsü tajungba ka asoshi imlaja atar," ta paisa shisem.

Mahmudullah asaya aliba mapang linük tenüng nungi ODI 239, test 50 aser T20I asaya 141 nung asayaago. Bangladesh nunger asayartem rongnungi pa kijai ODI World Cup nung century asem yanglua lir aser century asem ya ana 2015 küm aser ka 2023 küm yanglua liasü.

Taoba mapang Mahmudullah-i, Bangladesh Cricket Board (BCB) dang pa indang central contract 2025 küm February ita adenabo magütsütsü shiogo aser iba ajanga pa asaya nungi anentsü tebilemba aliba sayuogo.

Mushfiqur Rahim ODI asaya nungi anenba sülen tang Mahmudullah-i international cricket asaya nungi anentsü telemtetba agiogo.

BNP Paribas Open: Alcaraz & Bencic quarter-i iogo



Carlos Alcaraz



Belinda Bencic

Metsüremi/March 13, 2025 (Agencies): Tang asaya aliba BNP Paribas Open nung defending champion Carlos Alcaraz-i Bodhbarnü 6-1, 6-1 agi Grigor Dimitrov koka quarter-finals-i iogo.

Roger Federer aser Novak Djokovic na sülen Indian Wells titles asem atonga abenba asayar kümtsü atema Alcaraz meranga asayadar

Alcaraz taruba asaya Argentina nunger asayar Francisco Cerundolo den asayatsü. Cerundolo-i 7-5, 6-3 agi Australia nunger asayar Alex de Minaur koka liasü.

Kasa asayamung tetsür kija asaya nung Belinda Bencic-i world number three Coco Gauff tsükdakja quarter-final-i iogo, kong la Australian Open

champion Madison Keys den asayatsü.

Switzerland tsür Bencic-i 3-6, 6-3, 6-4 agi Gauff koka, la taoba küm tanur ka asoba sülen tang mezüngbuba WTA 1000 asayamung ka quarter-final tongtetogo.

Asaya nung Bencic-i mezüngbuba set bo makok saka lai tanungba set ana koka taküm Australian Open nung Gauff-i la round pezübuba nung tsükdaktsüba mangyangogo.

Tanga asaya ka nung Keys-i Croatia tsür Donna Vekic 4-6, 7-6 (9/7), 6-3 agi koka Australia Open akokba sülen mezüngbuba asayamung nung quarter tongtetogo.

Tetsürtem rongnung ano world number one asayar Aryna Sabalenka-ia 6-1, 6-2 agi British

tsür Sonay Kartal ayong ayonga koka quarter-finals-i iogo.

Sabalenka taruba round nung Italy tsür world number six Jasmine Paolini mesüra Russia tsür Liudmila Samsonova den asayatsü.

Tebur kija asaya nung America nunger asayar Ben Shelton-i külem America nunger asayar Brandon Nakashima 7-6 (8/6), 6-1 koka quarter-final tongtetogo.

Arishi küm 22 tain Shelton ya Andy Roddick sülen America nunger rongnungi Indian Wells quarter final tonga asayaba asayar tanobusang kümogo.

Pa taruba asaya 2022 champion Taylor Fritz mesüra Britain nunger Jack Draper den asayatsü.

Kiphire nung 3buba inter departmental sports meet asayadar



Dimapur, Metsüremi/March 13 (TYO): 3buba Inter - Departmental Sports Meet 2025 March 13 nü 14th IRB Camp, Kiphire nung tenzüko.

Iba asayamung ya Officers' Club, Kiphire-i ayongzüker aser "Unity in Service, Strength in Solidarity" omen nung ajemdaker asayadar.

March 13 nü asayamung lapokba sentong nung DC Kiphire, Tamsuwati Longkumer alakteta jaoker liasü.

Sentong nung o jembiba mapang DC-i, iba amala sentong ajanga department balala nungi employees tem pei designation kecha mebandangi longjemdaktsür aser sensaksemtsi asoshi maongka tajung agütsür, ta ashi.

Paisa, asayamung nung shilem agirtem dang iba maongka ya agia sentong mapang

medemer yimteptsü ajungshi, ajita asünungdang district ajungkettsü atema department balala tsüngda tesendaktep tajungba küma yanglushitsü.

Sentong nung DPO Kiphire, Lipichem-i lokti pela agizükba o jembi aser Albert Jinger-i ken tajung ka tena liasü. DFO, Kiphire Nzanthung-i achayanga asayartem tenangzüktepba agi aser 14th NAP (IR) women pastor Khalila-i sarasadema liasü.

Anogo ana asayatsü aliba department asayamung ya Red Bull, Blue Zungki Warriors, Green Saramati Riders aser Yellow Mountain Kings ta telok pezü küma lemsar asayadar.

Asayamung mapang Badminton, Darts, Carom (Double), Tug of War aser Football Penalty Shootout asayatsü.

BILEMDANGANG

"Tesüngjem mulungsentsü agi alizüng tongteter"